

a cette mission le nom de la Conception Immaculée de la s^{te}. vierge.

Il fut escouté avec vne Joye vniuersselle de tous ces peuples qui le prierent avec de tres grandes Instances qu'il eust a reuenir au plustost chés eux puis que sa maladie l'obligeoit a s'en retourner. Le p. de son Costé leur tesmoigna l'affection qu'il leur portoit la satisfaction qu'il auoit d'eux, et leur donna parole que luy ou vn autre de nos peres reuiendrait po⁹ Continuer cette mission si heureusement Commencée ce qu'il leur promit encore a diuerses reprises en se separant d'avec eux. po⁹ se mettre en Chemin, ce qu'il fit avec tant de marques d'amitié de la part de Ces bonnes gens qu'ils vouleurent l'accompagner par honneur pendant plus de 30 lieues de Chemin, se Chargans a l'enuy l'un de l'autre de son petit bagage.

SECTION SECONDE LE P. EST CONTRAINT DE QUITTER
SA MISSION DES ILINOIS SA DERNIERE
MALADIE, SA PRETIEUSE MORT
AU MILIEU DES FORETS.

APRES que les Ilinois eurent prit Congé du pere remplis d'une grande idée de l'euangile, il Continua son voyage et se rendit peu apres sur le lac des Ilinois sur lequel il auoit pres de cent lieties a faire par vne route inconnüe a ou il n'auoit Jamais esté parce qu'il estoit obligé de prendre du Costé du sud de ce lac estant venue par celuy du nord. Mais ses forces diminuerent de telle facon que ses deux ho^{es}. desespererent de le porter en vie Jusqu'au terme de leur voyage Car de fait il deuint si foible et si espuisé qu'il ne pouuoit plus s'ayder n'y mesme